

ՆՅՈՒԹԵՐ ՆՈՐ-ՆԱԽԻՋԵՎԱՆԻ ՍԱԼՂԱՆՆԵՐԻ ՄԱՍԻՆ

Խ. Ա. ՓՈՐՔՇԵՅԱՆ

«Սալղան» Նոր-Նախիջևանի բարրառում նշանակում է ճարպահալ գործարան, որտեղ ամեն փարի աշխան ամիսներին մորթում էին ամբողջ ամառվա և աշխան ընթացքում հատկապես ճարպի համար գիրացրած ոչխարների հոտերը և ճարպը հալեցնում:

«Շատ ժամանակ չէ, որ մի ֆրանսիական ընկերություն ոտք է հաստատել Նախիջևանի մոտ, որի խորհուրդն է զանազան մսեղեն պաշարներ պատրաստել Եվրոպա ուղարկելու համար» (Մ. Նալբանդյան, «Երկեր», հատոր 1, Ռոստով-Դոն, 1903, էջ 195—196):

Նոր-Նախիջևանի հյուսիսային կողմում, քաղաքից երկու կիլոմետր հեռավորության վրա, Անանուն ձորի (Безымянная балка) հարավային մասում, քաղաքային սպանդանոցի մոտերքը, կողք-կողքի շարված էին նախիջևանցի վաճառականների սալղանները, որոնց թիվը 18 էր¹։ Դրանք հիմա չկան։ Այնտեղ այժմ կանգնած է խոշոր արդյունաբերության հսկան՝ «Սելմաշ» գործարանը իր բարեկեցիկ բանավանդ և բազմաթիվ կուլտուրական հաստատություններով:

Սալղաններում մորթված ոչխարների հոտերը կոշվում էին քսեքներ, իսկ այդ գործով զբաղվողներին անվանում էին քսեքչիներ. նրանք մորթում էին բյուրավոր ոչխարներ և ճարպը (сапо) արտահանում:

Սալղաններ հիմնողները քսեքչիներն էին։ Նրանք մորթում էին իրենց քսեքները և իրենցից հետո շենքը վարձով էին տալիս սալղան շուկեցող քսեքչիներին:

Քսեքչիների զործը առևտրական անասնապահության, մասնավորապես խաշնարածության ամենաարդյունավոր ճյուղերից մեկն էր:

Դոնի ընդարձակ տափաստանը, Վոլգայի ստորին ջրաբաշխից սկսած մինչև Դենպրի ափերը, ամբողջ Դոնբասը և Հյուսիսային Կովկասը իրենց պարարտ հողերով, սննդառատ և հյութալից արոտներով, առատ խոտերով և քաղցրահամ ջրերով նպաստում էին առևտրական անասնապահությանը, մանավանդ նրբագեղմ ոչխարաբուծությանը։ Հայ առևտրականները լայնորեն օգտվեցին այդ նարավորություններից և Ղրիմի շոր, անշուր գաշտերից եկած հայ անասնապահները ուժեղ զարկ տվին առևտրի այդ ճյուղի զարգացմանը։ Սկզբում սալղանների գործով զբաղվում էին միմիայն Նոր-Նախիջևանում, 1822 թ. գնեբրալ Երմոլովի առաջարկով Նոր-Նախիջևանցի վաճառականների մի սովոր խումբ (50 ընտանիք) լեռնցիների հետ առևտուրը զարգացնելու նպատակով տեղափոխվեց Վոր հիմնված Ստավրոպոլ քաղաքը։ Այդ խմբի անդամներից մի քանիսը սալղաններ հիմնեցին և այնտեղ։ Այդ սալղանները աշխատում էին մեծ հաջողությամբ և նրանց տները շուտով դիզեցին խոշոր հարստություն։

1910 թ. նախիջևանցի վաճառական Եղիա Իսույանը իր շորս սալղաններից մեկը տեղափոխեց Հանքային ջրերի (Минеральные воды) մոտ գտնված ընդարձակ կալվածքը, որտեղ նա կենտրոնացրել էր իր ոչխարների մեծաքանակ հոտը։ Նույն ժամանակները խոշոր ոչխարաբուծ կազակ Շապովալովը, որ ուներ 9 խոշոր կալվածքներ, հայերի օրինակով նովոչերկասկ քաղաքում հիմնեց իր սեփական սալղանը, որտեղ մորթում էր իր կալվածքներում մեծացրած

¹ Այդ սալղանների շենքերը պատկանում էին՝

1. Ալախանյան Գևորգին	— 1 հատ	9 Կոտլյարով Գրիգորին	— 1
2. Իսույան Եղիային	— 4 »	10. Պոպով Գրիգորին	— 1
3. Օտարաշյան Մարկոսին	— 1 »	11. Տրապիզոնցյան Ղազարին	— 1
4. Պոպով Քերովբեին	— 1 »	12. Սերբերյակով Մանուկին	— 1
5. Պոպով Մանուկին	— 1 »	13. Մելիոզով Միքայելին	— 1
6. Պոպով Գարրիելին	— 1 »	14. Օրեռով Ակոփին	— 1
7. Պոպով Գեորգին	— 1 »	15. Սարիև Գրիգորին	— 1
8. Կրասիլնիկյան Գեորգին	— 1 »		

ու օխրաօրած ոչխարները: Չնայած սրան, սաղանների կենտրոնը մնում էր Նոր-Նախիջևանում և ամեն տեղերից այնտեղ էին դալիս սաղանի պատրաստած ապրանքները դնելու:

Մեծ է եղել նրանց դերը տեղական հայ ժողովրդի ամենօրյա կյանքում, մեծ է եղել նրանց դերը առևտրի մեջ, ամբողջ հարավային Ռուսաստանում, Դոնի և Հյուսիսային Կովկասի ժողովուրդների տնտեսական կյանքում:

Հողվածիս համեստ նպատակն է բանալ ընթերցողի առաջ քննքչիների գործունեության պատկերը, ցույց տալ սաղանների ծագումը, նրանց խաղացած դերը իրենց գոյության ամբողջ ընթացքում Նոր-Նախիջևան քաղաքի, շրջակա գյուղերի և ամբողջ երկրի տնտեսության մեջ:

Հողվածը կազմված է մեր անձամբ տեսած, ծերերից լսած և պատմական գրականության մեջ հայտնի փաստերի հիման վրա:

• •

Սաղանների գործը հայերը Նոր-Նախիջևան բերեցին Ղրիմից: Համառոտակի ծանոթանանք այդ գործի զրիմյան շրջանին:

Հայերը Ղրիմում միշտ ապրել են խաշնարած ժողովուրդների մեջ: Հայերի մեծ մասը առևտրականներ և արհեստավորներ էին: Նրանք ապրում էին ծովափնյա քաղաքներում: Փոքրաթիվ հայ գյուղացիք ապրում էին հարավային Ղրիմի լեռնային մասում: Երբ է կատարվել հայերի մուտքը Ղրիմ՝ հավաստի չգիտենք: Գիտենք հաստատ, որ խոշոր զանգվածային գաղթներ Հայաստանից դեպի Ղրիմ տեղի են ունեցել X և XI դարերում: 1204 թ. Սև ծովի ճանապարհները բացվեցին վենետիկցիների առաջ: Նրանք իրենց առևտրական գաղութների կենտրոն գարծրին Սուտակը, ուր շատ մեծ էր հայերի գերը²:

1261 թ. բյուզանդական կառավարության համաձայնությամբ Ղրիմի հարավային ծովափնյա մասում հաստատվեցին ջենովացիք: Նրանք Սև ծովի ափերին հիմնեցին 39 առևտրական գաղութներ ու ֆակտորիաներ, որոնց կառավարչական և առևտրական կենտրոնը գտնվում էր Կաֆայում: Այդ գաղութների և ֆակտորիաների բնակչության մեծամասնությունը կազմում էին հայերը³:

Ջենովացիների իշխանությունը ընդհատվեց 1475 թ., երբ Թուրքերը գրավեցին Կաֆան. ամբողջ Ղրիմը և նրա խանը դարձավ Թուրքիայի վասալը:

Ասիայի խորքերից Ղրիմ եկած խաշնարած ժողովուրդները ամենքն էլ ապրում էին Ղրիմի դաշտային մասում, նրանք առևտրով և արհեստներով շփվել էին զբաղվում:

Դեռ 671 թ. Ղրիմը անցավ խազարների իշխանության տակ: Նրանք հիմնեցին իրենց հսկա կահանաթը, որի իշխանությունը տարածվում էր Ուրալի լեռներից մինչև Դնեպրի ափերը: Նրանց պետությունը կործանեց (Իթիլը առնելով) Կիևի մեծ իշխան Սվյատոսլավը 965 թ.: Ղրիմում խազարների իշխանությանը վերջ դրեց Սվյատոսլավի որդի Մստիսլավը 1015 թ.: 1050 թ. Ղրիմին տիրեցին ղփչաղները. նրանք իրենց ուլուսի կենտրոն ընտրեցին Հին Ղրիմ քաղաքը, որ այն ժամանակ կոչվում էր Սուրխաթ:

1223 թ. Ղրիմ մտան մոնղոլ-թաթարները, որոնք իրենց արշավանքները Ռուսաստանում վերջացնելուց հետո վերջնականապես հիմնվեցին Ղրիմում 1239 թ.: Նրանց տիրապետությունը տևեց մինչև 1783 թ., երբ Ռուսաստանը Ղրիմը մտցրեց իր սահմանների մեջ:

Ասիայից շված այդ երեք ազգերն էլ թռչվոր անասնապահներ էին. նրանք իրենց անասունների հետ թափառում էին երկրից-երկիր: Ոչխարաբուծությունը նրանց տնտեսության մեջ բռնում էր առաջին տեղը:

Այդ թռչվորների նահապետական ձևերով վարած տնտեսությունը շատ անմխիթար վիճակի մեջ էր: Իրենց անասունների տված միսը, ճարպը, բուրգը, մորթիները, կաշիները նրանք չէին կարողանում մշակել, զարձենել առևտրական ապրանք և մտցնել առևտրի շրջանառության մեջ, սպառել ձեռնտու պայմաններով: Դեռ Ղրիմի առևտրի ջենովական շրջանում թռչվոր անասնապահներին ընդառաջ գնացին հայ առևտրականները:

Հոչակավոր առևտրական կենտրոն Կաֆան զբաղված էր Արևմտյան Եվրոպայի արգյունաբերական և արևելյան երկրների արտադրած ապրանքների փոխանակությամբ: Կաֆան այդ ապ-

² Брун, Черноморье, т. II, Одесса, 1880, էջ 139.

³ Зевакин и Пенчко, Очерки по истории генуезских колоний на западном Кавказе в XIII—XV вв., «Исторические записки», 1938, № 3, էջ 127.

րանքների հսկա շտեմարանն էր: Այդ տեսանկյունից են նայում եվրոպական պատմաբանները միջնադարյան Կաֆայի առևտրի վրա:

Առաջինը հայ վաճառականները ուշադրություն դարձրին Ղրիմի անասնապահների արտադրած ապրանքների վրա: Նրանք տեսան, որ Ղրիմը ինքն էլ ունի արժեքավոր ապրանքներ, որոնք Կարող են պատկառելի տեղ բռնել միջազգային առևտրում: Եվ սկսեցին եվրոպական արդյունաբերական ապրանքների փոխանակության ճանապարհով ձեռք բերել քոչվորների արտադրած ապրանքները և մտցնել շուկայական շրջանառության մեջ: Նրանք ձեռք էին բերում քոչվորների ձիերի երամակները, քշում Լեհաստան, Հունդարիա և այլ տեղեր, վաճառում այնտեղ մեծ վաստակով: Սկսեցին գնել քոչվորների պարարտ եզները, գիրացրած ոչխարների հոտերը, միսը աղալ, ճարպը հալեցնել և արտահանել Կ. Պոլիս ու Եվրոպա:

Ղրիմի ոչխարների դմակը, կռնակի ճարպը (խըոթիշ) և համեղ միսը Կ. Պոլսում և Իտալիայում ունեցել են մեծ հաջողություն: Շատ հեշտություններ և խոշոր վաստակներով արտասահմանում վաճառվել են ոչխարների բուրգը, մորթին, եզների հաստ կաշիները:

Ականավոր գիտնական Բրատիանուի հայտնաբերած XIII դարի նոտարական ակտերից տեսնում ենք, որ այդ ապրանքները դեռ այն ժամանակ, հայ վաճառականների մասնակցությամբ, մեծ դեր են խաղացել միջազգային առևտրի մեջ⁴:

Բարձր որակի ճարպ, համեղ միս, արժեքավոր բուրգ և մորթիներ կարող են տալ ազնվացրած ցեղի, մեծ խնամքով պահպանված պարարտ ոչխարները: Քոչվոր խաշնարածները, զրկված ամեն հարմարություններից, պրիմիտիվ պայմաններում, անձրևների և բուքի տակ, չէին կարող ազնվացնել ոչխարների ցեղը և պարարտացնել անհրաժեշտ չափով:

Հայ մսագործ վաճառականները սկսեցին իրենք զբաղվել գիրացման գործով: Նրանք գնում էին թաթար և նողայ խաշնարածներից բեղմնավորման համար արդեն օգտագործված, ամուլ թողած մայր ոչխարներ (անաբաշներ) և կամ ամորձատված 6—7 տարեկան արուներ (վալըխներ): Այդ ոչխարների հոտերը փորձված հովիվների խնամքի տակ ամբողջ զարնանը, ամռանը և աշնանը արածելով ամենաբարձր արոտավայրերում, լավ գիրանում էին և հավաքում առատ ճարպ:

Գիրացած ոչխարները ամեն աշնան մորթում էին: Այդ նպատակի համար հայ վաճառականները սկսեցին շինել առանձին շենքեր, որտեղ մորթած ոչխարների ճարպը հալեցնում էին գործարանական խոշոր կաթսաներում, հեղուկ գրությամբ լցնում մաքուր տակառների մեջ, միսը աղում, պատրաստում ապուխտ, էրեշկիկ, բալիքներ, իսկ լեզուները շորացնում: Այդ գործարաններում մշակված մթերքները մեծ հաջողություն ունեին արտասահմանի շուկաներում:

Մորթիները շորացնելու, բուրգը խուզելու, պատրաստի ապրանքները պահելու համար շինում էին շտեմարաններ և այլ օժանդակ շենքեր: Այդ բոլոր շենքերը, ի մի առած, կոչվում էին սալղաններ: Ըստ տեղեկությունների առաջին սալղանները բացվել են Կաֆայում, հետո Ղարսուրազարում, Հին Ղրիմում և Կոզլովում:

Առևտրական կապիտալի հաջողությունը հնարավորություն տվեց հայ և հույն վաճառականներին իրենց կապիտալը մտցնել անմիջապես ոչխարարուծության մեջ, տալ նրան արդյունաբերական ձև, արտադրել ոչխարներ, ստեղծել իրենց արտադրող մայր ոչխարների հոտերը և իրենց մեծացրած ոչխարներից ջոկել գիրացման հոտեր: Այդ, իհարկե, չէր խանգարում գնել և թաթարների հոտերը: Բացի բերնեբերան մեզ հասած տեղեկություններից, անմիջապես այս հարցին նվիրված պատմական աղբյուրներ մենք չունենք, կարող ենք դատել միմիայն կողմնակի աղբյուրների հիման վրա:

Մեզ հայտնի է, որ Ղրիմում խիստ զարգացած էին մաշկագործությունը, ոչխարների մորթիների մշակումը: Ոչխարարուծության և սալղանների գործի զարգացումը մեծ զարկ տվեց կաշեգործությանը: Բազմաթիվ հայ մաշկագործներ մշակում էին սալղանների շուկա ձգած մորթիները, պատրաստում Ղրիմի, Ջերքեզիայի և Հյուսիսային Կովկասի համար գույնզգույն մեշիններ, սաֆյաններ և այլ բազմաթիվ կաշվեղեն իրեր:

XVIII դարի երկրորդ կեսում, 25 տարի Ղրիմի խանության մեջ ֆրանսիական դեսպանի պաշտոն է վարել հայտնի տնտեսագետ Պեյսոնելը, որը իր կյանքի ամբողջ ընթացքում ուսումնասիրել է Սև ծովի ավազանի առևտրի պատմությունը և դրել երկու ստվար հատորներից բաղկացած մի արժեքավոր աշխատություն⁵:

⁴ Bratianu, Actes de notaire genois de Pera et de Caffa, Paris, 1927.

⁵ Peisonelle, Traité sur le commerce de la mer Noire, Paris, 1787.

Պեյսոնելի ստացած պաշտոնական տվյալների համաձայն մաշկագործ արհեստավորները, Ղրիմի ժողովրդի կարիքները բավարարելուց հետո, միմիայն Չերքեզիա արտահանել են՝

1. Դեզին մեշին (mechin)	20000 թուրա
2. Կարմիր մեշին	10000 »
3. Սպիտակ մեշին	20000 »
4. Սև մեշին	5000 » 6,

Այս քանակից ոչ պակաս մեշին արտահանել են Ղրիմից նողայների երկիրը։ Բացի այս արտահանվել են միշտ մեծ քանակով սաֆյան և մորթիներից պատրաստած շատ ուրիշ ապրանքներ։ Մաշկագործների պատրաստած այդ ապրանքները տանում էին նաև Դազստան և շատ այլ արևելյան երկրներ։

Մորթիներից պատրաստված ապրանքների պատկառելի քանակը ցույց է տալիս, որ ոչ խարարութուններ և սալղանների գործը Ղրիմում ունեցել են մեծ ծավալ և նշանակություն։ Պատմաբանների ասելով, մանավանդ հայտնի ղրիմագետ, Ղրիմի բազմահատոր պատմության հեղինակ Վ. Կոնդորակիի վկայությամբ, երկրի ներքին և արտաքին ամբողջ առևտուրը XVIII դարում գտնվել է հայերի ձեռքում⁶։ Նույն դրության մեջ էր և արհեստների գործը։ Ղրիմի հայ մաշկագործներն (տապախները) էին կաշեգործության մեջ գլխավոր դեր խաղացողները։

Սալղանների գործը մեծ զարկ տվեց օճառի և ճրագուների արտադրությանը։

Մի խոսքով կարելի է հաստատ ասել, որ հայ և հույն վաճառականները շատ նկատելի դեր էին խաղում Ղրիմի ինչպես առևտրական, այնպես էլ արդյունաբերական ոչխարարութության մեջ։

Ղրիմի խանի իշխանությունը, շնայած նրա ասիական ծագումին, ինքնակալ իշխանություն չէր։ Այն սահմանափակված էր Դիվանի իշխանությամբ։ Խանի արքունիքի բյուջեն շատ սահմանափակ շրջանակների մեջ առնված մի առանձին բյուջե էր։ Նրա գլխավոր աղբյուրը կազմում էին քրիստոնյա վաճառականների և արհեստավորների վճարած տուրքերը, որոնց նշանավոր մասը ստացվում էր սալղաններից։ Եվ որովհետև այդ անբավական էր, խաները կազմակերպում էին խոշոր հրոսակախմբեր և կատարում ավերիչ արշավանքներ հարավային Ռուսաստանի վրա։ Այդպիսի արշավանքներ կազմակերպում էր և թուրքական կառավարությունը Աղով բերդի վրայով, նոգայների օգնությամբ։

Խանի և սուլթանի հրոսակախմբերը կողոպտում ու թալանում էին քաղաքներն ու գյուղերը, խլում ժողովրդից նրա արյուն-քրտինքով աշխատած ապրանքները, քշում նրանց անասունները, և ամենազարհուրելին այն էր, որ գերի էին տանում մարդկանց, տղաներին ու աղջիկներին, արտահանում արևելյան շուկաները և ծախում ստրկության։

Այդպիսի դրության հետևանքով հարավային Ռուսաստանի բերրի և հացառատ հողերը մինչև XVIII դարի վերջին քառորդը մնում էին անմարդաբնակ և անմշակ, իսկ ոռոգման մոթիկը ստիպված էր քրտինք թափել հյուսիսի անպտուղ, կրախառն հողերի վրա։

Այդ բանի վրա ուշադրություն դարձրեց Պետրոս I-ը, բայց Սև ծով դուրս գալու նրա ձգտումները իրագործեց Եկատերինա II-ի կառավարությունը։

Պետրոս I-ից հետո ոռոսաց բանակը երկու անգամ գրավեց ամբողջ Ղրիմը, սակայն չմիացրեց իր սահմաններին, խուսափելով միջազգային բարդացումներից։

1774 թ. Թուրքիայի խոշոր պարտությունից հետո, Քուլուկ-Կայնարչիի դաշնագրության համաձայն, Ռուսաստանը ստացավ Կերչ և Ենիկալե բերդերը Ղրիմում, Կինրուռն և Ազով բերդերը։ Ռուսաց նավատորմի ղեկավար Կերչի նեղուցը, ամբողջ Սև ծովը, Դարդանեյն ու Բոսֆորը։ Այս դաշնագրությունը մի մեծ այգ էր հարավային Ռուսաստանի զարգացման համար։ Հարավային Ռուսաստանը առհավետ ազատվեց թաթարների և թուրքերի հարձակումներից։

Սկսվեց հարավային Ռուսաստանի բուռն շինարարությունը։ Ղրիմի խանը ընդմիշտ զրկվեց Ռուսաստանից բերված ավարներից ստացված իր եկամտի խոշոր աղբյուրից։ Խանի եկամտի միակ աղբյուրը մնաց քրիստոնյաների վճարած տուրքը։ Ռուսաց կառավարությունը որոշեց

⁶ Նույն տեղում, հատ. I, էջ 127—128։

⁷ Նույն տեղում, էջ 325—335։

⁸ В. Кондоракн, Универсальное описание Крыма, СПб., 1875, էջ 113 և հտ.։

զրկել խանին նաև եկամտի այդ միակ աղբյուրից, դուրս բերել Ղրիմից բոլոր քրիստոնյաներին: Ղրիմի քրիստոնյաներն էին հայերն ու հույները և ստրկությունից ազատված մի քանի տասնյակ վրացիք:

Ծրագրի հեղինակն էր դեներալ Ռուսլանցև-Ջադունայսկին: Նրա զեկուցման հիման վրա Եկատերինա II-ը 1778 թ. մարտի 8-ին մի առանձին ռեսկրիպտով հրամայեց քրիստոնյաներին Ղրիմից հանել և բնակեցնել հարավային Ռուսաստանի բերրի հողերի վրա:

Այդ բռնագաղթի գործը սկզբում հանձնարարեցին գեներալ Պրոդորովսկուն: Բայց նա դա համարեց անարդար գործ և հիվանդության պատրվակով ստացավ երկամյա արձակուրդ ու հետագավ: Նրա տեղը նշանակվեց Սուվորովը, որը դուրս բերեց Ղրիմից բոլոր քրիստոնյաներին: Լաց ու կոծով նրանք թողեցին իրենց հարյուրավոր տարիների ընթացքում շինված գյուղերն ու քաղաքները, պարտեզներն ու այգիները: Քրիստոնյաներին խոստացել էին նոր կառուցվող Եկատերինոսլավ (այժմ Դնեպրոպետրովսկ) քաղաքը իր ամբողջ շրջանով: Դրա համար Սուվորովը գաղթականներին բերեց Դնեպր գետի Օբյուլ և Սամար ճյուղերի միջև ընկած դաշտավայրը, կանգ առավ, որպեսզի այստեղից սկսեն հողերի բաժանումը: Սակայն շուտով պարզվեց, որ գաղթականներին խոստացված բոլոր հողերը գրավել են բարձրաստիճան զինվորականները. գաղթականներին առաջարկեցին որոնել և գտնել ուրիշ համար հող:

Սուվորովը, իրեն հանձնված գործը կատարած համարելով, հետագավ: Մի տարի անց հույները ստացան Մարիուպոլ քաղաքը իր շուրջը գտնվող 775000 դեսյատին ընտիր հողով, իսկ հայերը 1779 թ. նոյեմբերի 14-ին ստացան շուրջ 90 հազար դեսյատին հող Դոն գետի աջ ափին, Դմիտրի Ռուստովսկու բերդի արևելյան մասում:

Հայ գաղթականները շինեցին Նախիջևան քաղաքը և նրա շրջակայքում գտնվող 5 գյուղերը:

Հայերը, ինչպես և հույները, Ղրիմից դուրս են բերել մեծ քանակությամբ ոչխար, բայց ոչ ոք այդ թիվը հաստատ չդիտե: Մենք լսել ենք ծերունիներից, որ անցյալ դարի վերջերին Ասխովին Պետրոսի և Օտարաշին Մարկոսի Ղրիմից բերած ոչխարների թիվը այնքան մեծ է եղել, որ իրենք էլ ստույգ չեն իմացել այն: Խիստ շատ ոչխարներ են իրենց հետ բերել և չուլթրցի Թոխթամիշներն ու Խըտոները:

Ծոռմին պապին, որ հարյուր տարվա հովիվ էր և մեռավ մեր դարի սկզբին, հաստատում էր, որ Ղրիմից հայերը բերել են երկու հարյուր հազար ոչխար, իսկ մի այլ ծերունի՝ Ղազար պապին (Ծիխերալյան) հաստատում էր, որ ոչխարաբույծ Տրապիզոնցյանները և Օրբյանները ունեցել են հարյուր հազար զլուխ: Ոչխարների հսկայական քանակի մասին են վկայում նաև սալղանների թվերը: Ղրիմից հայերը բերել են 7 սալղան, որոնցից 5-ը սկսել են աշխատել հենց քաղաքի գոյության առաջին օրվանից: Սալղանները իրենց գոյությունը պահել են շուրջ 140 տարի: Այդ ժամանակաշրջանում նրանք, մանավանդ սարքավորումը, անշուշտ ենթարկվել են փոփոխությունների: Մենք լսել ենք չորս սալղանների տեր, մեծ ոչխարաբույծ Եղիա Բայանից, որ Ղրիմից բերած սալղանները բոլորն էլ ունեցել են պղնձե կաթսաներ, որոնց մեջ ճարպը հալեցրել են և լցրել ոչ միայն փայտե տակառների, այլև ոչխարների փորերի մեջ: Նրա աներն ունեցել է այդպես կահավորված սալղան, որը հետո վերանորոգվել է և պատկանել իրեն: Այդ մասին մենք լսել ենք և այլ քսեքչիներից՝ Գաբրիել Պոպովից, Դանիել Խազիզովից և ուրիշներից:

Ինչպես արդյունաբերական, այնպես էլ առևտրական ոչխարաբուծությունը Նոր-Նախիջևանի հիմնավորման առաջին օրերից նրա տնտեսության մեջ բռնեց մեծ և պատկառելի տեղ: Ոչխարների գիրացման (քսեքների) և սալղանների գործը հարավային Ռուսաստանի, Դոնի և Հյուսիսային Կովկասի բարենպաստ պայմաններում արագորեն զարգացավ և շատ լայնացրեց իր գործունեության շրջանակները:

Մի քանի անգամ հողերի սահմանները փոփոխելուց հետո հայ հասարակությունը ստացավ շուրջ 92000 դեսյատին հողամաս: Ըստ հրովարտակի՝ 12 հազար դեսյատին ստանում էր քաղաքը, 30-ական դեսյատին ամեն մի շնչի համար ստանում էին դյուղացիք: Հող ստացող գյու-

ղացիների թիվը 1300 հոգուց պակաս էր, այնպես որ քաղաքի և դյուղացիների հասանելիք հողամասերը կտրելուց հետո աղատ մնում էր մոտ 40 հազար դեսյատին հող, որ, որպես ամբողջ հայ հասարակության պատկանող ֆոնդ, մնում էր հայոց Մագիստրոսի տրամադրության տակ։ Այդ հողերը վարձակալում էին անասնապահները՝ հոտերն արածեցնելու և խոտը հնձելու համար։

Հայերի հողամասը խոփ շտեմած կուսական հող էր։ Հարավային կողմից հայկական հողի սահմանն էր 'Իոն գետը, հյուսիսից՝ Սամբիկ գետի ձորը։

Սամբիկի ձորից դեպի հյուսիս գտնվող դաշտավայրը, որը հասնում էր մինչև Միուս գետը, այսինքն հույն գաղթականության հողամասի սահմանները և որը հայտնի էր Սամբիկի հյուսիսային տափաստան անունով, բոլորովին ազատ էր։ Նրա մեծությունը հասնում էր հարյուր հազար դեսյատինի։ Հովսեփ Արղությանի խնդրանքով իշխան Գրիգորի Պոտյոմկինը խոստացել էր այն հատկացնել շերքեզահայերին։ Այդ որոշումը հաստատել էր և Ալեքսանդր I կայսրը, մինչև իր մահը նա պահեց այդ հողը նրանց համար, բայց զանազան, իրենցից անկախ պատճառներով շերքեզահայերը չկարողացան գալ։

Հյուսիսային տափաստանը, որ խիստ բերրի և խոտառատ դաշտ էր, միշտ կապալով էին վերցնում հայ անասնապահները։ Անասնապահությունը զարգացնելու նպատակով պետությունը նշանակում էր շնչին կապալավարձ։ Միուս գետի աջ ափը, մինչև Ազովի ծովը, պատկանում էր հույն գաղթականներին։ Հույն գաղթականների թիվը հայերի հետ համեմատ այնքան էլ մեծ չէր, ըստ պաշտոնական տեղեկությունների այն հասնում էր 19 հազար հոգու⁹, իսկ ակադեմիկոս Բուտկովի ասելով, հայերի թիվը շուրջ 20 հազար էր¹⁰, բայց հույները ստացան 775 հազար դեսյատին հող, որ նրանք անկարող էին մշակել կամ անասնապահության համար օգտագործել¹¹։ Հույների ավելորդ հողերից, նրանց արոտներից և խոտերից դարձյալ օգտվում էին հայ անասնապահները, դիտավորապես ոչխարաբուծությամբ զբաղվողները։ Հունաց հողերի վրա մեծ տընտեսություն են ունեցել Ղարաշայանները, որոնք զբաղվել են խոշոր և մանր եղջերավոր անասնապահությամբ։

Հույները ևս զբաղվում էին ոչխարաբուծությամբ, սակայն իրենց սաղանները շունեին, քեսեքների համար մեծացրած ոչխարները ծախում էին նախիջևանցիներին։ Հայերից և հույներից առաջ XVIII դարի կեսերին, ռուսաց կառավարության հրավերով Դենպրի Ձախափնյա Ուկրաինա եկան թուրքերի բարբարոսությունից զզված բազմաթիվ սերբեր, բուլղարներ, խորվաթներ, մակեդոնացիներ, հունդարացիներ և այլ ազգեր։ Նրանք նախօրոք ստացել էին խոշոր արտոնություններ, որի հիման վրա հիմնեցին իրենց ինքնավար Սլավյանո-Սերբիա գաղութը, Բախմուտ (այժմ Արտեմևսկ) կենտրոնով, հիմնեցին Սլավյանո-Սերբսկ քաղաքը, բազմաթիվ գյուղեր և Սլավյանսկ բերդաքաղաքը։ 1753 թ. իրենց զորքերով այստեղ եկան սերբական զնդապետ Ի. Շևիչը և Ռ. Պոեռատովիչը։ Նրանց հանձնվեց այդ երկրի պաշտպանությունը Ղրիմի թաթարների և թուրքերի արշավանքներից։ Այդ գաղթականները ստացան շատ բերրի և խոշոր հողամասեր։ Սրանք ևս խաշնարած ժողովուրդներ էին։ Նրանց մեծացրած անասունների, դըլխավորապես ոչխարների հոտերը ևս մեծ մասամբ գնում էին նախիջևանցի քեսեքիները։ Այդ գնած ոչխարները նույն Սլավյանո-Սերբիայի արոտատեղիներում պահում էին ամբողջ ամառը, գիրացնում և միմիայն աշնանը քշում նախիջևանի սաղանները՝ մորթելու։ Սլավոն ազգերը նախիջևանցի քեսեքիներին տալիս էին մեծ քանակով քեսեքի ոչխարներ։

1783 թ. Ղրիմը միացվեց Ռուսաստանին։ Հայ քեսեքիների առաջ բացվեցին Ղրիմի դռները։ Դռնի ամբողջ տափաստանը, Ձախափնյա Ուկրաինան, Դոնբասը և Ղրիմը իրենց ոչխարներով և հարուստ արոտատեղիներով դարձան հայ քեսեքիների գործունեության լայն ասպարեզը։

•
•

Հայերին և հույներին Ղրիմից հանելուց հետո Սովորովը դնաց ամրացնելու իր հիմնած Ազով—Մոզդոկ ռազմական դիժը։ Նա այդ գծի վրա ստեղծեց ինը բերդաքաղաք և բազմաթիվ ամրոցներ։ Կուրան գետը Ռուսաստանի և Թուրքիայի միջև սահմանագիծ էր։ Այդ ափը պատկա-

⁹ Н. Дубровин, Присоединение Крыма к России, т. II, էջ 711.

¹⁰ Бутков, Материалы для новой истории Кавказа, с 1772 по 1803 г., ч. II, էջ 47.

¹¹ Томашевский, Переселение православных христиан Крыма в Мариупольский уезд, М., 1892, էջ 23.

նում էր Թուրքիային, իսկ ձախը՝ Ռուսաստանին: Հյուսիսային Կովկասի ժողովուրդները ևս, ինչպես կարարդացիք, բալկարները, կումիկները, նոգայները և ուրիշներ, խաշնարածներ էին, լեռներում աճեցնում էին սև դմակավոր ոչխարներ: Այս անասնապահները կապված չէին ընդհանուր ռուսական շուկայի հետ, նրանց տնտեսությունը գտնվում էր շատ ցածր մակարդակի վրա:

Աղով—Մոզդուկ ռազմական գծի վրա պետությունը շինեց Գեորգիևսկ, Ստավրոպոլ և Եկատերինգրադ քաղաքները: Կովկասի քաղաքացիական իշխանության գլուխ կանգնած իշխան Պավել Պոտյոմկինը լեռնցիների հետ առևտուրը զարգացնելու նպատակով Նոր-Նախիջևանից հրավիրում է մի մեծ խումբ հայ վաճառականների, որոնք 1783 թ. հիմք դրին հայոց եկեղեցու ուսումնարանին, հայոց առևտրասրահին և քարվանսարային (ГОСТИНЫЙ ДВОР)¹²:

Այս հողվածի նպատակից դուրս է տալ Հյուսիսային Կովկասի առևտրի պատմությունը և նկարագրել հայերի կատարած դերը այդ ասպարեզում: Բայց անկարելի է խոսել քեսեքչիների մասին, որոնք նմանապես վաճառականներ են, առանց մատնանիշ անելու ամենօրյա ընդհանուր առևտուրը:

Գեորգիևսկի առևտրական նշանակությունը շատ շուտով հայ վաճառականները բարձրացրին այնչափ, որ նրա տոնավաճառները ստացան համաշխարհային հռչակ: Հայ առևտրականները կապ հաստատեցին վաղուց ի վեր Ջերբեգիայում ապրող հայ վաճառականների հետ և ամբողջ Ջերբեգիայի լեռներում արտադրված անասնապահական ապրանքները լցվեցին Գեորգիևսկի շուկան: 1817 թ. Գեորգիևսկում եղած Մինաս Բժշկյանը այնտեղ տեսել է 80 կրպակ¹³, որոնք պատկանել են հայերին: Լեռներից քշվում էին բազմաթիվ ոչխարների հոտեր, որոնք գնում էին Նախիջևանի քեսեքչիները: Գեորգիևսկի տոնավաճառը խիստ մեծ դեր էր խաղում Ռուսաստանի տնտեսության մեջ մինչև 1872 թ., երբ երկաթուղին կապեց Կովկասը Ռուսաստանի հետ և տոնավաճառի նշանակությունը նվազեց: Նախիջևանի սալղանների գործում մեծ դեր է կատարել Ստավրոպոլի նահանգի ոչխարաբուծությունը:

1808—1809 թթ., կառավարության առաջարկությամբ, Ստավրոպոլ եկան նախիջևանցի 50 ընտանիք: Նրանք շատ մեծ դեր խաղացին առևտրի զարգացման մեջ¹⁴: 1826 թ. նույն կառավարության հրավերով, գեներալ Երմոլովի առաջարկով, Ստավրոպոլ եկան ևս 30 ընտանիք հայեր¹⁵: Այդ հայ վաճառականները, սպառելով ռուսական ու եվրոպական արդյունաբերական ապրանքները լեռնցիների մեջ, կամա թե ակամա ստիպված էին գործ ունենալ լեռնցիների գլխավոր ապրանքի՝ անասունների հետ: Արդյունաբերական ապրանքների հետ փոխանակելով և կամ ուղղակի գնելով, նրանք ձեռք էին բերում մեծ քանակով խոշոր և մանր եղջերավոր անասուններ: Վաճառականներից ոմանք իրենք ևս ունեին սալղաններ: Ձեռք բերված ոչխարները նրանք կամ ծախում էին նախիջևանցի քեսեքչիներին և կամ իրենք մորթում սալղաններում: Ոչխարը կովկասյան առևտրի մեջ բոնում էր շատ մեծ տեղ: Կովկասյան կոիվները վերջանալուց հետո շատ ռուս և հայ վաճառականներ ձեռք բերեցին խոշոր հողամասեր անասնապահության համար: Դրանցից էին՝ Բժիշկ Հովհաննես Քերբերյանը, Աստվածատուրյանները, Բիրիկյանները, Փախալյանները, գեներալ Նազարովը, Թորոսյանները, Բողոտսուկյանները և մի քանի տասնյակ այլ նախիջևանցի վաճառականներ:

Թորոսյանները, Պոպովը, Սարգիսովը, Գասպարյանը և շատ ուրիշներ ունեին խոշոր հոտեր՝ մի քանի տասնյակ հազար մայր ոչխարներով: Մեղ անձամբ հայտնի է, որ Եղիա Բայանը Հանքային ջրերի (Минеральные воды) կալվածքում ուներ 12000 մայր ոչխար, որոնք տալիս էին այդքան էլ դառներ: Բացի դրանից, նա ամեն տարի գիրացման համար պահում էր 45—50 քեսեք ոչխար: Այդչափ էր և Օղարաշյանի, Կրասիլնիկյանի և այլոց ոչխարաբուծությունը: Մեծ կապիտալ մտքին ոչխարաբուծության մեջ ռուս անասնապահները, Նեստերենկոները, Մազայանները և շատ ուրիշներ ունեին մի քանի տասնյակ հազար մայր ոչխարներ, կային ոչխարաբուծներ, որոնց ոչխարների թիվը անցնում էր հարյուր հազար գլխից:

Անցյալ դարի սկզբին ոչխարաբուծները մեծ նշանակություն էին տալիս ոչխարի ճարպին: Ու մսին, սակայն շատ շուտով ճարպի կողքին զուգահեռաբար առաջնակարգ նշանակություն ստացավ ոչխարի նուրբ բուրգը:

¹² Ш а б л о в с к и й, Георгиевская старина, СПб, 1914, էջ 12.

¹³ Մ. Բ ժ շ կ յ ա ն, Ծանապարհորդութիւն ի Հեհաստան, Վենետիկ, 1830, էջ 408.

¹⁴ «Кавказский календарь за 1853 г.», էջ 473.

¹⁵ Նույն տեղում, էջ 477.

Անդլիան, Ֆրանսիան և ամբողջ արևմտյան Եվրոպան նուրբ բրդի մեծ պահանջ էին զգում, Միայն իսպանական ցեղի մերինոս ուխարների բրդից կարելի էր պատրաստել թանկարժեք տեսակի ընտիր մահուդներ։ Այդ առիթ տվեց շատ նախիջևանցի առևտրականների՝ երես դարձնել սև շոնդուխ ուխարներից, որոնց բուրդը քիչ էր ու կոշտ և դժգոհել միմիայն մերինոս ցեղի ուխարարությունից։ Բազմաթիվ կալվածատերեր, շատ հայ ուխարարություններ ստիպված եղան ձեռք բերել մերինոսի հոտեր։ Հայ վաճառականներից շատերը Դոնբասում և Հյուսիսային Կովկասում ուխարարությունից համար դնեցին խոշոր հողամասեր։ Նրազեղմ ուխարների բուծումը զարգացնելու պատրվակով դեռ XVIII դարի վերջերին Կարապետ Ոսկանյանը և Հովհաննես Աբրահամյանը հայ հասարակությանը տրված հողերից հափշտակել էին խոշոր կալվածքներ, 1811 թ. Նախիջևանի առևտրական անասնապահությանը զբաղվող 25 վաճառականներ Տագանբոգի քաղաքապետ Օտտո-Ֆրանկի թույլտվությամբ ստացան հայ հասարակությանը պատկանած հողերից 25 նոր կալվածքներ՝ 200—300 ղեսյատին տարածությամբ։

Այս «օրինական» հափշտակումից հետո ուխարատեր վաճառականները ինքնազուխ կերպով սկսեցին հափշտակել հայ հասարակությանը տրված հողերը և այդտեղ ստեղծել ագարակներ։ Բանը հասավ այն աստիճանի, որ համբերատար գյուղացիք ստիպված եղան ինքնազուխ հափշտակողների ագարակները այրել և նրանց էլ վռնել դուրս։ Մինչև այսօր էլ այդ այրված ագարակների տեղերը կոչվում են «էրած խութուներ»։ Այդ աղմկոտ ժամանակից օգտվեց հայտնի հափշտակիչ, քաղաքազուխ հալիպյանը և տիրացավ շորս օրինակելի ագարակների։

Դոնի կազակների հեծելազորքը ուներ շատ ընդարձակ Սալի տափաստանը, որ սկսվում էր Դոնի ձախ ափերից և հասնում մինչև Վոլգա, Ռոստովից մինչև Վոլգոգրադ։ Դա շատ արժեքավոր կուսական հող էր, հայտնի իր սննդարար արոտներով և խոտերով, 782658 ղեսյատին տարածությամբ¹⁶։ Դոնի զինվորական իշխանությունը այդ տափաստանը բաժանել էր 2000—2500 ղեսյատին մեծություն ունեցող քառակուսի հողամասերի, որոնք շատ էժան գներով վարձով տրվում էին մասնավոր մարդկանց՝ ձիարությունից համար։ Այդ հողերի վրա հիմնվեցին մոտ 150 խոշոր տնտեսություններ, որոնց մեջ կային 10—15 հազար ղեսյատին հողամաս ունեցողներ։ Նրանց պարտականությունն էր ամեն տարի Դոնի հեծելազորքին տալ որոշ քանակով ձիեր։ Ձիարությունը կապալառուների համար ձեռնտու չէր, գրա համար էլ նրանց թույլ էր տրվում զբաղվել նաև անասնաբուծությամբ և ուխարարությամբ։ Այդ տնտեսությունները ամեն տարի տալիս էին հարյուր հազարավոր սալղանի ուխարներ։ Ամեն աշնան, սեպտեմբերի կեսերից սկսած, Հյուսիսային Կովկասի բոլոր վայրերից և հարավային Ռուսաստանի բոլոր ուխարարուծական շրջաններից պարարտ ուխարների հոտերը կամաց-կամաց, ծանրաքայլ ճամփա էին ընկնում դեպի Նոր-Նախիջևանի սալղանները։

Ամեն ամառ, մինչև սեպտեմբերի կեսերը, բոլոր սալղանատերերը վերանորոգում էին իրենց սալղանները և պատրաստվում քսեքներ ընդունելու։ Հոկտեմբերի մեկին (հին տոմարով) տեղի էր ունենում սալղանների բացումը, այդ օրվանից սկսվում էր մորթը։ Այդ օրը սալղանատերերը և քսեքչիները սալղաններից մեկում, համարյա միշտ Պոպով Քերոբի սալղանում, սարքում էին մեծ ճաշկերույթ։ Հրավիրում էին քաղաքազուխին, քաղաքային վարչության անդամներին, քաղաքապետին, ոստիկանապետին և այլ պաշտոնավոր անձանց։ Այդ հանդեսին միշտ հրավիրվում էր հայտնի զուռնաչի Ճոին իր նվագախմբով։ Նվագում էին միմիայն հայկական, Ղրիմից բերված երգեր։

Քաղաքազուխը իր ձեռքով բաց էր անում սալղաններից մեկի դարպասը և ուխարները ներս էին թափվում բակը։ Այդ իրավունք էր տալիս բոլոր սալղաններին սկսել մորթը։ Ամեն մի սալղան բռնում էր 1—1½ ղեսյատին հողամաս։ Դա նրա բակն էր, որ շրջապատված էր լինում բարձր տախտակապատով։

Բակի մեջտեղում շինված էր լինում սալղանը, նրա գլխավոր շենքը, որի երկարությունը հավասար էր բակի լայնությանը։ Սալղանների գլխավոր շենքերը բոլորն էլ շինված էին քարաշար հիմքերի վրա, բարձր առաստաղով, երկու կողմից լուսավորված բարձր ու լայն պատուհաններով։ Նրա մեջտեղում, ամբողջ երկարությամբ, շարված էին լինում 10—12 խոշոր կաթսաներ, որոնց մեջ հալեցնում էին ուխարների ճարպը։

¹⁶ И. П. Хлыстов, Дон в эпоху капитализма, Ростов, 1962, էջ 92.

Կաթսաների տակ, խոր գետնի մեջ, սարքում էին երկար վառարան, որ բարձրորակ քա-
րածուխով տաքացնում էր կաթսաները և հալեցնում ճարպը: Կաթսաների երկու կողմերում,
շենքի ամրողջ երկարությամբ շարված էին լինում սեղաններ (СТОЛКИ), որոնց վրա մորթում էին
ոչխարները:

Ամեն մի սալղանատեր մորթի ժամանակ բանեցնում էր 32—35 բանվոր, որոնք մորթում
էին, քերթում, ճարպը հալեցնում, միսը աղատում ճարպից, մշակում, մորթիները շորացնում և
այլև: Բանվորներն ապրում էին սալղանների հանրակացարաններում: Ամեն օր, ամեն մի նոր
հոտի հետ դալիս էին շորս հովիվ, որոնք նույնպես շուրջ մի շաբաթ ապրում էին հանրակա-
ցարանում:

Ոչխարների տերերի մեջ ևս հաճախ պատահում էին հեռվից եկած մարդիկ, որոնք մորթի
ժամանակ գիշեր-ցերեկ ապրում էին սալղաններում, նրանց ևս հարկավոր էր մի անկյուն: Այդ
նպատակով սալղանների բակերում կառուցում էին մեծ տուն-հանրակացարան, ուր ապրում էին
բանվորներն ու հովիվները՝ առանձին-առանձին սենյակներում: Ոչխարների տերերի համար ևս
այդ տան մեջ լինում էր ապրելու առանձին տեղ: Այդ տան մեջ լինում էր մեծ խոհանոց և
ընդարձակ ճաշարան: Բացի այդ շենքերից լինում էին մեծ ամբարներ, որտեղ քեսեքչիները
դարսում էին ճարպի և մսի տակառները, շորացրած մորթիները՝ մինչև ծախելը: Բակի մի ծայ-
րում շինում էին մի մեծ փարախ, որտեղ պահվում էր մորթի եկած ամբողջ հոտը: Բացի այդ
մեծ փարախից, սալղանի բուն շենքին կից լինում էր մի փոքր փարախ 100—120 գլուխ ոչ-
խարների համար: Մորթի ժամանակ շոբանները մեծ փարախից մաս-մաս ոչխարները բերում
էին այդ փարախը, իսկ մորթողները մորթելու էին տանում այդտեղից: Ամեն մի սալղանի
բակում լինում էր ձողերից պատրաստված հարմարություն մի քանի հաղար մորթի շորացնելու
համար: Թաց մորթիները կախում կամ փռում էին այդ ձողերի վրա, 2—3 օր շորացնում և
ապա հավաքում ու դարսում պահեստում:

Ամեն մի սալղան ունենում էր մի կամ երկու ջրհոր: Ամեն մի գլուխ ոչխարի համար սալ-
ղանատերերը ոչխարի տիրոջից ստանում էին 10—12 կոպեկ: Բանվորների աշխատավարձը վը-
ճարում էր սալղանի տերը: Միայն միսը՝ սննդի համար, տալիս էր քեսեքչին: Եփելու համար
վերցնում էին ճարպաղուրկ վզի միսը, որը համարվում էր ամենահամեղը:

Յուրաքանչյուր սալղան օրական մորթում էր մի հոտ ոչխար, որ բաղկացած էր լինում
1000—1300 գլխից: Ամեն հոտին տրվում էր 2—3 կաթսա, 3 օր ժամանակով. այդ ընթաց-
քում մորթող քեսեքչին պարտավոր էր ճարպից կաթսաները ազատել և առհասարակ դուրս գալ
սալղանի գլխավոր շենքից:

Առավոտյան ժամը 5—6-ին սկսվում էր մորթը: Հովիվները մեծ փարախից ջրկում էին
100—130 ոչխար և բերում փոքր փարախը, որ կից էր լինում սալղանի գլխավոր շենքի պատին:
Երկու-երկու բանվոր փոքր փարախից վերցնում էին մի-մի ոչխար: Առջևի երկու ոտքերի արանքը
մտցնում էին մի փոքր փայտ, որի երկու ծայրերն էլ ունենում էին կիսակոր փոսեր: Առջևի ոտ-
քերը ձգում էին փոսերի մեջ, փայտը բռնում էր մի բանվոր, իսկ հետևի ոտներից բռնում էր
երկրորդ բանվորը: Բանվորները ներս էին բերում ոչխարը և կռնակի վրա դնում մորթի սեղա-
նին: Մի ակնթարթում մորթողը խրում էր դանակը ոչխարի սիրտը: Գլուխը չէին կտրում: Ոչ-
խարի մարմինը իսկույն կախում էին և հանում մորթին ու կռնակի ճարպաշապիկը: Եթե մորթ-
վողը դմակավոր էր, կռնաշապիկի հետ հանում էին և դմակը: Դմակը և կռնաշապիկը ձգում էին
մի կաթսայի մեջ: Այնուհետև բաց էին անում փորը և հանում փորի ճարպը և հաստ աղիքները՝
ճարպը վրան: Մորթողը հաստ աղիքները կտրում էր կտոր-կտոր և ամեն մի կտորը բռնեցքի
սեղմումով մաքրում: Փորի, հաստ աղիքների ճարպը, ոչխարի ամբողջ գլուխը (լեզուն միջից
հանելուց հետո), ողնաշարը և կողոսկրները ձգում էին երկրորդ կաթսայի մեջ: Այդ ամենը
հսկա կաթսաների մեջ հալվում և հեղուկ էր դառնում:

Դմակի և կռնաշապիկի հալեցրած ճարպը համարում էին առաջին որակի, սննդի համար
գործածելու ճարպ (кашное сало), իսկ փորի, գլխի, աղիքների և ոսկորների վրայի հալեցրած
ճարպը համարվում էր երկրորդ որակի, տեխնիկական ճարպ (техническое сало):

Հալեցրած ճարպը հեղուկ դրությամբ մեջ լցնում էին տակառները, փակում և տանում ամ-
բարը: Ծարպաղուրկ միսը բաժանում էին տեսակների: Առանձին կտրում էին՝

1. Առջևի ոտների թիակները, 2. հետևի ոտները իրենց փափուկ մասերով, 3. ողնաշարի տակի փափուկ միսը՝ ֆիլեն, 4. ճարպազուրկ վզերը, 5. լեզուները:

Բացի սրանից առանձին հավաքում էին թոքերը և երիկամները: Մի խոսքով ոչխարները սալղաններում դառնում էին:

1. Ճարպ, 2. միս, 3. մորթի՝ բուրդը վրան, 4. թոքեր և 5. երիկամներ:

Ոչխարների բարակ աղիքները տեղն ու տեղը գնում էին օտարազգի վաճառականները՝ միական գործարանների համար: Առանձին հավաքում էին և սմրակները:

Սալղանների արտադրած ապրանքները մեծ նշանակություն ունեին ժողովրդի պարենավորման համար: Մեզ ծանոթ շրջանում, 1897-ից մինչև 1917 թվականը, սալղանները ծախում էին.

1. Ճարպազուրկ թիակների փութը՝ 50—80 կոպ.:
2. Հետևի ոտքերի փութը (փափուկ միսը վրան)՝ 1 ո. մինչև 1 ո. 20 կոպ.:
3. Ֆիլեն միսը բալիքների համար՝ փութը 1 ո. 50 կոպ.-ից մինչև 1 ո. 80 կոպ.:
4. Ճարպազուրկ վզի միսը՝ փութը 40 կոպ.:
5. Լեզուների հարյուրը՝ 3 ո.:
6. Թոքերի հարյուրը՝ 1 ո. 50 կոպ.:
7. Երիկամների հարյուրը՝ 1 ո.:
8. Սմրակների հարյուրը՝ 1 ո.:

Քաղաքի և գյուղերի ժողովուրդը գնում էր այդ մսեղեն մթերքները, գործածում ամենօրյա սննդի համար և նրանցից պատրաստում ամբողջ տարվա պաշար:

Առջևի ոտքերի թիակներից պատրաստում էին ապուխտներ: Սկզբում այդ թիակները աղում էին, հետո լավ չամանապատում և պարանի վրա զույգ-զույգ կախած չորացնում գուրսը: Աղը և զլխավորապես չամանը պահպանում էին միսը վնասվելուց: Շուրջ երկու շաբաթվա ընթացքում միսը չորանում էր և դառնում համեղ ուտելիք: Ժողովուրդը մեծ քանակով պատրաստում էր ապուխտ և գործածում ամբողջ ձմռանը և գարնանը: Ապուխտը վաճառվում էր տեղական շուկայում կամ արտահանվում էր Ղրիմ, Օգեսա և այլ վայրեր: Ետևի ոտքերը ծախում էին փափուկ միսը վրան: Ետևի ոտքերի մսից պատրաստում էին էրեշկիկ կամ երշիկ: Ոտների վրայի միսը հանում էին առանձին, առանց ոսկորների, փափուկ միսը աղում հատուկ մեքենայով, մանրացնում. մեջը լցնում չաման, սև պղպեղ և երբեմն նաև սխտոր: Այդ մանրացրած և համեմած միսը լցնում էին հատկապես էրեշկիկի համար պատրաստված լայն աղիքների մեջ, ծայրերը կապում բարակ թելով, երկու ծայրերը միացնում և բացօթյա կախում՝ չորանալու: Ամեն առավոտ այդ էրեշկիկները գրտնակով տափակացնում էին, ցերեկը կախում էին բակում կամ պատշգամբում, գիշերները հանում թավանը: 15—20 օրվա ընթացքում էրեշկիկները չորանում էին և դառնում համեղ ուտելիք:

Էրեշկիկը տարածված ուտելիք էր նախիջևանցիների մոտ: Շատերը պատրաստում էին մեծ քանակով և ծախում տեղում, տանում Ղրիմ, Օգեսա և Մոսկվա: Էրեշկիկը ընդունված էր և տեղական ուս ժողովրդի մեջ:

Հետևի ոտքերի մսազուրկ ոսկորները գործածվում էին զանազան տեսակի սպասներ պատրաստելու համար:

Մորթի ժամանակ առանձին հավաքում էին փափուկ միսը՝ ֆիլեն: Ժողովուրդը գնում էր այդ ֆիլեն և նրանցից բալիք պատրաստում: Այդ միսը լվանում էին, աղում, թաթախում չամանի մեջ և կախում չորանալու: Նա ևս չորանում էր ապուխտների և էրեշկիկների հետ միասին:

Ամենից ավելի ընդունված ուտելիք էր ոչխարների լեզուն: Շատ մեծ էր նրա պահանջը: Չնայած թանկ գնին (3 կոպեկ հատը) ամեն մի նախիջևանցի ընտանիք վերցնում էր մի քանի հարյուր լեզու: Մեծ մասը նրանք չորացնում էին: Լեզուները մաքրում էին, լվանում, աղում և փաթաթելով չամանի մեջ, պարանի վրա զույգ-զույգ կախում էին չորացնելու: Շատ խանութներ և առաջնակարգ հյուրանոցների սեղանատները զբաղվում էին նրա սպառումով: Բացի չորացնելուց, լեզուները թեթև խաշում էին և պահում մալինադի մեջ: Շատերը չորացնում էին հազարներով և տանում ուրիշ քաղաքներ վաճառելու:

Վզի վրայի ճարպը հանելուց հետո մնում էր վզոսկրը իր վրայի փափուկ մսով: Մասնագետների կարծիքով վզոսկրի միսը ամենահամեղ, ամենափափուկ և սննդարար միսն է: Չնայած

դրան, մորթի ժամանակ այն ոչ ոք չէր գնում, թեպետ գինն էլ շատ էժան էր, փութը ընդամենը 40 կոպեկ, Վլի միսը տեղացի և եկվոր վաճառականները աղում էին և արտահանում վաճառելու: Ժողովրդի մեծ մասը ևս ամբողջ ձմեռվա համար աղում էր սալղանի միս, բայց շնայած դրան տեղական շուկայի պահանջները չէին կարող սպառել սալղանների արտադրած միսը: Թոստովի և Նախիջևանի մսավաճառները աշնան ամիսներին շուկաների մեջ վրաններ էին սարքում և ծախում սալղանի միս: Սալղանները ամեն օր մորթում էին սաւսր հազարից ավելի ոչխար, միսը մնում էր: Շատ քեսեքչիներ իրենք էին աղում մնացած միսը, շատերն էլ տեղն ու տեղը ծախում էին Ղրիմից եկած կարաիմ և թաթար վաճառականներին, նրանք աղում էին հարյուրավոր ու հազարավոր տակառներով, տանում Ղրիմ, Պոլիս և այլ տեղեր: Հայ քեսեքչիներից այդ գործով լրջորեն զբաղվում էին Ղուկաս և Գևորգ Ղարազյոզյանները: Նրանք պահում էին 4—5 քեսեք, բայց աղում էին տասնյակ հազարավոր փութ: Գևորգ Ղարազյոզյանը ամբողջ տարին բանեցնում էր իր տակառների գործարանը, նրանց մեջ աղում սալղանի միս: Այդ աղած միսը նրանք շատ անգամ ծախում էին տեղում՝ եկվոր կարաիմ վաճառականներին և կամ իրենք տանում Ղրիմ և Օդեսա: Ղարազյոզյանների օրինակին հետևողներ շատ կային:

Սալղանները ծախում էին ամեն օր մի քանի հարյուր թոք և երիկամունք: Մեծ քանակով թոքեր ու երիկամներ մնում էին չծախված: Դրանք լցնում էին մի մեծ հորի մեջ, որտեղ ձգում էին և փորերը: Այդ ամենի վրա աղ էին ցանում և ամբողջ ձմեռը կերակրում ոչխարապահ շներին: Ամեն մի քեսեք գալիս էր սալղան իր երկանիվ սայլով և շներով, որոնց քանակը 5—6-ից պակաս չէր լինում: Նրա քեսեքները մորթում էին, հեռվից եկած քեսեքչիները իրենց շներին թողնում էին պահապանների մոտ, որոնք մի ռուրի տարեկան վարձով ամբողջ ձմեռը կերակրում էին դրանց: Գարնանը քեսեքչիները առնում էին իրենց սայլերը շների հետ և ուղևորվում նոր քեսեք ընդունելու:

Սալղանները մեծ սպառում ունեին: Կար նույնիսկ ժողովրդական երգ.

Կինմարդիկ. մարդիկ	Ազրաբից օշրան
էկավ նուր սալնիկ,	Կախած կրչուրնան:
Եղ ու միս իլինի,	Ցուրեկը սուֆան,
Ապուխտ, էրեշկիկ,	Դիշերը քավան,
Չուվաններուն վրան,	Պոլկեկ շաման
Լեզու ու բալիֆ,	Համան կլլուրնան:

Հոկտեմբերից մինչև նոր տարի Նախիջևանում և գյուղերում խիստ ընդունված էր չամանով «խըյման» (քուֆթան), որից պատրաստում էին կոտլետներ, կարկանդակներ, սամսաներ և կոմոն ու թեկուրաթիներ: Քաղաքում երգում էին՝

Ուշկեկ զիզին,	Պեթիր կրպարի
Գաբուել-Միֆայելին,	Միսով կուրաթի:

Սալղանները իրենց գոյությունը պահպանեցին մոտ 140 տարի:

Այդ ընթացքում դրանք զգալի փոփոխությունների են ենթարկվել: Սկզբի շրջանում ճարպն ու միսն էր զլխավոր դեր խաղացողը: Հետագայում թեպետ ճարպը չկորցրեց իր դերը, բայց նրա կողքին առաջին տեղը բռնեց նուրը բուրդը: Սկզբում քեսեքները բաղկացած էին լինում միմիայն դմակավոր ոչխարներից, իսկ հետո եվրոպական արդյունաբերության պահանջով քեսեքները կազմվում էին միմիայն նրբագեղմ իսպանական ոչխարներից:

Քեսեքչիների համար զլխավորը ճարպն էր, ապա և բուրդը: Նրանց քանակից էր կախված քեսեքչի վաստակը: Գիրացրած ամեն մի ոչխար կարող էր տալ 25—40 ֆունտ ճարպ և միջին թվով 12—16 ֆունտ նուրբ բուրդ: Ինչպես նշեցինք, դեռ Ղրիմում հայ մաշկագործները մեծ քանակով մորթիներ էին մշակում, արտահանում մեշին, սաֆյան և այլ ապրանքներ: Նախիջևանի շրջանում ևս հայ մաշկագործները պատրաստում էին մեծ քանակով լավ որակի ապրանքներ և արտահանում Նվրոպա: Գարրիել Պատկանյանը իր Նոր-Նախիջևանի պատմության մեջ մեծ գովասանքով է խոսում նախիջևանցիների այդ արհեստի և նրա խոշոր դերի մասին¹⁷: Մագիստրատի գործերից ևս տեսնում ենք, որ մաշկագործների միությունը մեծ դեր է խաղացել քա-

17 Գ. Պատկանյան, Նոր-Նախիջևանի պատմությունը, Ն. Նախիջևան, 1917, էջ 49:

զաքի տնտեսության մեջ: Պատկանյանի ասելով, թանկարժեք ոտնամանների համար պատրաստված գույնզգույն փափուկ կաշվեղենը նվրոպայում մեծ հաջողություն ուներ:

Սակայն սալղաններում մորթված ուխարների թիվը այնքան մեծ էր, որ մեծ քանակով հում մորթիներ էլ ծախվում էին օտաբազդի վաճառականներին, որոնք տանելով իրենց երկրները, պատրաստում էին եվրոպական ճաշակի կաշվեղեն ապրանքներ:

Երբ առաջացավ նուրբ բրդի մեծ պահանջը և ուխարատերերը ստիպված եղան պահել միմիայն իսպանական ցեղի ուխարներ, ուխարատերերը սկսեցին քսեքի համար ջոկված ուխարները տալ քսեքչիներին միմիայն գարնանը՝ բուրդ խուզելուց հետո: Իսպանական ուխարները երկրորդ անգամ չէին խուզում, բուրդը վրան քշում էին սալղան: Բուրդը ստանում էր մորթիներին: Բրդի պատճառով շատ բարձրացավ և մորթիների գինը: Իսպանական ուխարների մորթիները ծախում էին 3 ո. 50 կոպեկից մինչև 4 ո. 50 կ.: Իսպանական ուխարների չվացած բրդի փութը արժեք 11—12 ո.:

Անցյալ դարի առաջին կեսում Դոնի ափին, Կսնաշ կղզու վրա նախիջևանցի վաճառական Գարրիել Մելքոնով-էզեկովը հիմնեց բուրդ մաքրելու և լվանալու մեծ գործարան: Դա իր տեսակի միջ առաջին գործարանն էր: Այդ գործարանը, որ մեծ հաջողություն ունեցավ, գնում էր բուրդը, լվանում և ծախում մեծ վաստակով: Բացի այդ, նա առանձին վարձով լվանում էր ուրիշների բուրդը: 60-ական թթ. Ռոստովում ևս բացվեց մի այդպիսի գործարան: 70-ական թթ. Մելքոնով-էզեկովը համարվում էր Նոր-Նախիջևանի ամենահարուստ վաճառականը: Բուրդը և բրդագուրկ մորթիները նա ծախում էր արտասահմանի համար: Մորթիների մի զգալի մասը գնում էին հայ մաշկագործները և վերամշակում: Կսնաշ կղզու լվացարանի մոտ հիմնվեց տեխնիկապես կատարելագործված մաշկագործարան, որը գնում էր քսեքչիների մորթիները, բուրդը առանձին մշակում, իսկ մորթիներից պատրաստում էր մեծ քանակով խրոմ, շեմրո և շատ ուրիշ տեսակի ապրանքներ: Գործարանը ուներ համառոտական նշանակություն: Նա ապրանքներ էր մատակարարում զինվորական իշխանություններին և այլ պետական հիմնարկներին:

Նույն Մելքոնով-էզեկովը ժառանգական իրավունքների համաձայն տիրացավ Նոր-Նախիջևանի ամենամեծ և ամբողջ Ռոսաստանում հռչակված խաչկուռուզյանի օճառի գործարանին, որ մեծ քանակով գործածում էր սալղանների երկրորդ տեսակի ճարպը:

էզեկյանը, որ լավ ճանաչում էր բուրդ հայ քսեքչիներին, կապ հաստատեց նրանց հետ և սկսեց բուրդ ցանկացողներին նախօրոք վճարել զալիք տարվա ճարպի, բրդի և զլխավորը՝ մորթիների արժեքի որոշ տոկոսը: Քառորդ դարից ավելի հայ քսեքչիների մեծ մասը օգտվում էր այդ վարկից և աշխատելով շուկայի գնով սալղանների ապրանքը տալիս էզեկյանին:

Մելքոնյան-էզեկյանների վարկը մեծ զարկ տվեց քսեքչիների գործի զարգացմանը: Առևտրական կապիտալը շաղկապում էր մաշկագործարանը, լվացարանը, օճառի գործարանները սալղանների, քսեքչիների և ուխարապահությանը զբաղվողների գործերի հետ:

Ամենակարող կապիտալի կենտրոնացմից ուժերը իրեն էին հպատակեցնում մասն քսեքչիներին: Վարկի շնորհիվ քսեքչիների գործով սկսեցին զբաղվել շատ գյուղացիներ:

Որքան է եղել սալղաններում մորթված ուխարների թիվը ամեն տարի, մենք հաստատ չգիտենք: Պաշտոնական տվյալներ չունենք, քաղաքային արխիվի նյութերում ևս բավարար պատասխան չգտանք: Քաղաքային ինքնավարությունը, գործ ունենալով միմիայն սալղանատերերի և ոչ թե քսեքչիների հետ, մորթված ուխարների թիվը չի ցուցակագրել:

Ենթադրելի տակ կան Հայկական ՍՍՀ գիտությունների ակադեմիայի պատմության ինստիտուտի աշխատակից Վ. Բարխուդարյանի՝ Լենինգրադի կենտրոնական արխիվում հայտնաբերած հետևյալ տվյալները: Տազանրոգի քաղաքապետի պաշտոնական հաշվետու զեկուցման համաձայն, 1815 թ. Նոր-Նախիջևանում եղել է 35000 ուխար, իսկ գյուղերում՝ 9500 գլուխ: 1824 թ. ըստ նույն հաշվետվության եղել է՝ Նախիջևանում՝ 27500 ուխար, իսկ գյուղերում՝ 29792 գլուխ:

Այս թվերը շատ հեռու են ճիշտ լինելուց:

Գյուղերի 9500 գլուխը 1824 թ. հասել է 29792 գլխի, դա հասկանալի աճ է: Բուրդովին ան-

18 ЦГИАЛ, ф. 1281, оп. 11, д. 1341, л. 388.

19 Նույն տեղում, д. 136, л. 26.

հավատալի է քաղաքի ոչխարների թվի պակասելը: Դա բացատրվում է նրանով, որ քաղաքի ոչխարապահների ոչխարները գտնվում էին քաղաքից դուրս, ագարակներում և կամ կապալով վերցրած կալվածքներում: 27500 ոչխար, երևի, գտնվել է քաղաքում և կամ քաղաքի հողերի վրա, նրա արոտատեղիներում: Մեկ լավ հայտնի է, որ այդ շրջանում միմիայն հալիպյանը իր շորս ագարակներում պահել է տասնյակ հազարներով մայր ոչխարներ: Սախավ Պետրոսը ունեցել է նրանից շատ ավելի, իսկ Տրապիզոնցյանը նրանից էլ ավելի:

Սալդանները իրենց գոյության 140 տարվա ընթացքում անշուշտ ենթարկվել են տատանումների: Սկզբում, երբ հարավային Ռուսաստանում երկրագործությունը քիչ էր զարգացած և դաշտերի մեծ մասը ազատ էր, ժողովրդի տնտեսության զլխավոր արդյունքը անասնապահությունն էր տալիս: XIX դարի 60-ական թթ. սկիզբում են զարգանալ հողագործությունը, հատկապես ցորենի մշակությունը, արդյունաբերությունը:

XIX դարի երկրորդ կեսում արագորեն զարգանում է կապիտալիզմը: Կենտրոնական Ռուսաստանը հարավային Ռուսաստանի և Կովկասի վրա նայում էր որպես իր գաղութների վրա, որոնք սպառում էին իր ապրանքները և մատակարարում մեծ քանակով հումք²⁰:

Դոնի մարզը երկար ժամանակ խոշոր արդյունաբերական ձեռնարկների կողքին տեղ էր տալիս մանր արդյունաբերական գործերին: Դա բացատրվում էր նրա տնտեսության ագրարային բնույթով:

1890 թ. գոյություն է ունեցել 19 սալդան²¹: Արդյունաբերության զարգացումը ուժեղ աղեցություն ունեցավ ոչխարաբուծության վրա: 1880 թ. ոչխարաբուծ Ֆիլիբերտը ուներ իսպանական ցեղի 40000 մայր ոչխար, Գուտովսկին՝ 25000, Իլովայսկին՝ 16500 մայր ոչխար²²: Այդ տնտեսությունները հարավային Ռուսաստանում ունեին խիստ մեծ նշանակություն: Նրանք ամեն տարի հայ քեսեքչիներին ծախում էին մեծ քանակով գիրացման ոչխարներ: Իսպանական ոչխարները ծախվում էին միմիայն քեսեքչիներին, մսավաճառները չէին գնում, որովհետև սպառողները չէին գնում նրանց ճարպաթափա միսը: Դմակավոր ոչխարի միսը համեղ է, որովհետև նրա ճարպը հավաքվում է զլխավորապես դմակների մեջ: Կապիտալիզմի զարգացումը, հողագործության աճը, ցորենի մեծաքանակ մշակումը և արտասահմանյան շուկաները ոտք դնելը չվնասեցին հայ քեսեքչիներին: Կապիտալիստների ոչխարաբուծությունը ամեն տարի մեծ քանակով ոչխարներ էր մատակարարում քեսեքչիներին:

Մեզ, որպես նախկին քաղաքային դումայի պատգամավորի Լ. նրա քննիչ հանձնաժողովի անդամի, ծանոթ է սալդանների գործը:

Մեծ կալվածատեր, խոշոր ոչխարաբուծ, վաղեմի սալդանատեր, անցյալ դարի 90-ական թթ. սկսած քանի-քանի անգամ քաղաքագլուխ ընտրված Քերովբե Միքայելի Պոպովը պատմեց մեզ, որ նա 50 տարի եղել է սալդանատեր, որ 35 տարուց ավելի նա ամեն տարի մորթել է 50-ական հազար իր ոչխարները և 20 հազար զլխից ոչ պակաս ուրիշների ոչխարներ: Սալդանների թիվը միշտ 12-ից պակաս չի եղել, իսկ ավելի՝ եղել է: Նրա ասելով միմիայն Տրապիզոնցյան վաճառականը մորթել է իր սալդանում շուրջ հարյուր հազար ոչխար:

Տրապիզոնցյանի գործը շարունակվել է մինչև 1886 թ.: Պոպովի կարծիքով սալդաններում մորթված ոչխարների թիվը եղել է ութ հարյուր հազարից շատ ավելի: 35 տարի քաղաքային վարչության անդամ ծառայած, քաղաքի ամբողջ տնտեսությունը վարող, հայ գրականության ծանոթ Հարություն Խատամյանը 19 տարի քաղաքագլուխ ընտրված Մինաս Բալարանյանը, սպանդանոցի անասնաբույժ Սոցկիչը և շատ ծերեր միաբերան հաստատում էին, որ սալդաններում մորթված ոչխարների թիվը եղել է մոտ մի միլիոն զլուխ:

Մեր օրերին, XIX դարի վերջերին և XX դարի սկզբին Նախիչևանի ամենախոշոր քեսեքչիները մորթում էին 50 հազար զլխից ոչ պակաս:

Սալդանները և քեսեքները եղել են առևտրական անասնապահության եկամտաբեր ճյուղերից և ունեցել են մեծ նշանակություն Նոր-Նախիչևանի շրջակա դյուղերի ժողովրդի պարենավորման գործում, ազդել են Դոնրասի և Հյուսիսային Կովկասի ոչխարաբուծության վրա և իրենց արտադրած ապրանքներով կապել նրանց արևելյան և արևմտյան երկրների հետ:

²⁰ См. А. И. Гозулов, Народное хозяйство Дона до и после Октября, Ростов, 1947.

²¹ См. ЦГВИА, ф. 4, оп. 54, д. 54, л. 46.

²² См. И. П. Хлыстов, Дон в эпоху капитализма, Ростов, 1962, էջ 92.